



Adresa: **Ul. Hamdije Čemerlića 39**  
71000 Sarajevo  
<http://www.voda.ba>

tel. +387 33 726 400  
fax. +387 33 726 423  
e – mail: [info@voda.ba](mailto:info@voda.ba)

Broj: **UP-1/21-1-40-405-3/26**  
Datum: **17.08.2026. godine**

«Agencija za vodno područje rijeke Save» Sarajevo (u daljem tekstu Agencija), rješavajući po zahtjevu Agencije podnesenom putem «Sektora za realizaciju investicionih projekata», za donošenje Rješenja o prethodnoj vodnoj saglasnosti za vađenje materijala iz korita rijeke Drine na lokalitetu Džindići, Grad Goražde, na osnovu člana 139. stav (1) tačka 6. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22) **donosi**

### **RJEŠENJE** **o prethodnoj vodnoj saglasnosti**

1. Podnosiocu zahtjeva, Agenciji, daje se prethodna vodna saglasnost u svrhu provođenja daljih aktivnosti na dodjeli prava na vađenje materijala iz korita rijeke Drine i izradi Elaborata za vađenje materijala iz korita rijeke Drine, na lokalitetu Džindići, koji obuhvata dijelove zemljišnih čestica označenih kao k.č. 6071 i 6072 K.O. Vranići i k.č. broj 4180 K.O. Oglečeva, Grad Goražde.
2. Prethodna vodna saglasnost prestaje da važi ukoliko u roku od tri godine od dana pravosnažnosti ovog rješenja ne bude podnesen zahtjev za izdavanje vodne saglasnosti od strane pravnog lica kome bude dodijeljeno pravo na vađenje materijala.
3. Prethodna vodna saglasnost se daje na osnovu pregleda dokumentacije dostavljene uz zahtjev i uz zadovoljenje sljedećih uslova:
  - 3.1. Za namjeravano vađenje materijala iz korita rijeke Drine na lokalitetu Džindići, Grad Goražde, pravno lice kojem bude dodijeljeno pravo na vađenje materijala dužno je pripremiti potrebnu dokumentaciju kao i Elaborat vađenja materijala koji će sadržavati:
    - geodetsko snimanje (ne starije od tri mjeseca) situacije i poprečnih profila riječnog korita (na rastojanju do 50,00 m) i uzdužne profile u razmjeri 1:100 ili detaljnije, koje se izvodi preko operativnog poligonog vlaka sa osiguranjem krajnjih tačaka poprečnih profila na terenu trajnim biljegama uz položajni opis i nacrt (trigonometrijski obrazac 27), preko kojih će se po završetku radova izvršiti kontrolna geodetska snimanja,
    - izrada situacije lokaliteta na kome se planira vađenje materijala, uzdužnog i poprečnih profila riječnog korita u odgovarajućoj razmjeri,
    - tehničko rješenje načina izvođenja radova i utvrđivanje njihovog obima koje će obavezno uzeti u obzir da se tim radovima bitno ne remeti dinamika prirodnih procesa i prirodna ravnoteža ekosistema ili ne pospiješi štetno djelovanje voda,
    - dinamiku vađenja materijala (usklađenu sa ugovorenim rokom za završetak radova),
    - bilans masa materijala,
    - definiranje lokacije i površine deponije u zavisnosti od utvrđene količine materijala vodeći računa da se ista ne može nalaziti u inundacionom pojasu,
    - na osnovu podataka iz katastarskog plana, na preglednoj situaciji obilježiti granice parcela koje su u državnom, odnosno privatnom vlasništvu, a nalaze se u zoni planiranih radova i gradilišta, trasu pristupnog puta i lokaciju deponije izvađenog materijala,
    - deponija izvađenog materijala mora biti locirana izvan uticaja velikih voda (izvan plavnog područja) i izvan vodnog dobra i javnog vodnog dobra,
    - mogući uticaj na izvoriste pitke vode čije se zone sanitarne zaštite prostiru ili su u neposrednoj blizini predmetnog lokaliteta, ako takvo postoji i uvjeti za zaštitu izvorišta prilikom izvođenja radova,
    - pregled postojećih korisnika vode sa vodotoka,
    - ocjenu mogućnosti nastanka negativnih uticaja na druge objekte i postrojenja, korito vodotoka, površinske i podzemne vode, stečena prava korisnika, naselja i sl. i mjere za ublažavanje tih uticaja.

- 3.2. Vađenje materijala treba vršiti u periodu usaglašenom sa ribolovnim društvima iz Grada Goražda, odnosno korisnikom ribolovnog prava na ovom ribolovnom području, vodeći računa o periodu mriještenja plemenite ribe.
- 3.3. Izvođač radova dužan je riješiti imovinsko-pravne odnose sa vlasnicima zemljišta za pristup lokalitetu vađenja materijala, kao i do lokaliteta za odlaganje izvađenog materijala, a prije vađenja materijala iz vodotoka.
4. Prije podnošenja zahtjeva za izdavanje vodne saglasnosti izvođač radova, sa kojim se sklopi Ugovor o izvođenju predmetnih radova, dužan je izraditi Elaborat za vađenje materijala iz vodotoka. Elaborat će se uraditi u skladu sa članom 5. stav (3) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), a isti treba da bude urađen od strane ovlaštenog pravnog lica (lista «A») shodno Pravilniku o uslovima i kriterijima koje mora zadovoljiti pravno lice za izradu dokumentacije na osnovu koje se izdaju vodni akti («Službene novine Federacije BiH», broj 17/08), te u skladu sa uslovima datim u tački 3.1. dispozitiva ovog rješenja.
5. Uz zahtjev za izdavanje vodne saglasnosti, u rokovima propisanim Ugovorom o vađenju materijala, Izvođač treba dostaviti sljedeću dokumentaciju:
- Elaborat izrađen u skladu sa uslovima iz tačke 3.1. dispozitiva ovog rješenja,
  - Ugovor o izvođenju predmetnih radova potpisan sa «Agencijom za vodno područje rijeke Save», Sarajevo,
  - Dokaz o izvršenoj uplati upravne takse u iznosu od 60 KM,
  - Ovjerenu kopiju rješenja o upisu u sudski registar i identifikacioni broj,
  - Potvrdu nadležnog korisnika ribolovnog prava o dozvoljenim terminima izvođenja radova na predmetnom lokalitetu, u skladu s periodom definiranim dodijeljenim ugovorom o vađenju materijala iz vodotoka,
  - Validne dokaze Izvođača da je riješio pitanje imovinsko-pravnih odnosa na trasi pristupnog puta do lokacije vađenja materijala iz vodotoka, te do lokacije za deponovanje, kao i na samoj lokaciji za deponovanje izvađenog materijala.
6. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje Rješenja o vodnoj saglasnosti, potrebno je o istim obavijestiti ovu Agenciju (ugovorni organ), a u zahtjevu za izdavanje vodne saglasnosti navesti te okolnosti.

### **Obrazloženje**

Podnosilac zahtjeva, «Agencija za vodno područje rijeke Save» Sarajevo, putem «Sektora za realizaciju investicionih projekata» Agencije, dostavio je zahtjev dana 06.08.2026. godine za donošenje rješenja o prethodnoj vodnoj saglasnosti za vađenje materijala iz korita rijeke Drine na lokalitetu Džindići, kao jednu od mjera za sprečavanje štetnog djelovanja voda, koji obuhvata dio zemljišne čestice k.č. broj 6071 i 6072 K.O. Vranići i k.č. broj 4180 K.O. Oglečeva, Grad Goražde.

Uz zahtjev je dostavljena sljedeća dokumentacija:

- Kopija Rješenja o izmjenama podataka broj: 065-0-Reg-25-003258 izdatog dana 13.08.2025. godine od strane Općinskog suda u Sarajevu;
- Kopija Obavještenja o razvrstavanju pravnog lica prema klasifikaciji djelatnosti broj: 07-32.5-45391/12 izdatog dana 11.12.2012. godine od strane Službe za statistiku za područje Kantona Sarajevo;
- Kopija Uvjerenja o poreznoj registraciji izdatog dana 14.12.2012. godine od strane Porezne uprave Federacije BiH - Kantonalni porezni ured Sarajevo;
- Kopija Izvještaja Komisije sa uviđaja na licu mjesta radi sagledavanja stanja korita rijeke Drine i ocjene opravdanosti pokretanja postupka dodjele prava vađenja materijala na području Grada Goražde broj: 30-996-3/26 od 28.07.2026. godine;
- Kopija Odluke broj: 30-996-6/26 o utvrđivanju potrebe za vađenje materijala iz vodotoka Drine donesene dana 31.07.2026. godine od strane direktora AVP Sava Sarajevo na temelju izvršenog uviđaja na lokalitetima na području Grada Goražde ;
- Kopija katastarskog plana UR broj: 07-30-3-288/2018-4 izdatog dana 29.05.2018. godine od strane Službe za geodetske, imovinsko pravne poslove i katastar nekretnina Grada Goražde;
- Kopija Posjedovnog lista broj 1191, broj akta: 07-30-1-1142/18-2 izdatog od strane Službe za geodetske, imovinsko pravne poslove i katastar nekretnina Grada Goražde dana 29.05.2018. godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i članom 21. Pravilnika o sadržaju, obliku, uslovima, načinu izdavanja i čuvanja vodnih akata o zahtjevu je dana 07.08.2026. godine obaviještena javnost putem obavještenja na oglasnim pločama «Agencije za vodno područje rijeke Save» u Sarajevu, te dana 08.08.2026. godine u dnevnom glasilu «OSLOBOĐENJE». U ostavljenom roku nije bilo pisanih izjašnjenja o predloženim aktivnostima iz zahtjeva.

U provedenom postupku konstatovano je sljedeće:

U cilju utvrđivanja činjeničnog stanja na terenu, aktom broj: 30-996-2/26 od 26.06.2026. godine formirana je Komisija za uviđaj na licu mjesta radi sagledavanja stanja korita rijeke Drine i utvrđivanja potrebe za uklanjanjem nanesenog materijala na području Grada Goražda. Nakon uviđaja na terenu, Komisija je dana 28.07.2026. godine sačinila «Izveštaj Komisije sa uviđaja na licu mjesta radi sagledavanja stanja korita rijeke Drine i ocjene opravdanosti pokretanja postupka dodjele prava vađenja materijala na području Grada Goražde» u okviru koga je dato stručno mišljenje i priložena fotodokumentacija sa kratkim opisom stanja na terenu i zaključkom za dalje postupanje. U stručnom mišljenju je konstatovano da, na lokalitetu Džindići, Grad Goražde, po procjeni Komisije ima oko 7875 m<sup>3</sup> materijala za uklanjanje, te da treba pokrenuti postupak za uklanjanje istog iz korita rijeke Drine.

Utvrđena količina je definirana u skladu sa članom 63. Zakona o vodama kojim je propisano da je «Vađenje materijala iz vodotoka dozvoljeno u obimu i na način koji bitno ne mijenja prirodne procese, ne remeti prirodnu ravnotežu ekosistema ili ne pospješuje štetno djelovanje voda».

Na osnovu provedenog uviđaja na lokalitetu Džindići, Grad Goražde, sačinjenog Izveštaja, stručnog mišljenja i fotodokumentacije, donesena je od strane AVP Sava Odluka o utvrđivanju potrebe za vađenje materijala iz vodotoka Drine broj: 30-996-6/26 od 31.07.2026. godine, čime su se stekli uslovi za pokretanje upravnog postupka, a sve prema odredbama člana 6. Uredbe o načinu dodjele prava na vađenje materijala iz vodotoka («Službene novine Federacije BiH», broj 58/15).

Na osnovu priložene dokumentacije u kojoj je utvrđena potreba za vađenjem materijala iz korita rijeke Drine na lokalitetu Džindići, Grad Goražde u procijenjenoj količini od cca 7875 m<sup>3</sup>, u dispozitivu ovog Rješenja su utvrđeni uslovi kojima mora udovoljiti dokumentacija na osnovu koje će se pokrenuti postupak za izdavanje vodne saglasnosti za vađenje materijala pravnom licu kome bude dodijeljeno pravo na vađenje materijala, a sve u skladu sa članom 111. stav (1) Zakona o vodama, članom 5. stav (3) i (4) i članom 10. stav (3) Pravilnika o sadržaju, obliku, uslovima, načinu izdavanja i čuvanja vodnih akata.

#### **Uputa o pravnom lijeku:**

Protiv ovog Rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema Rješenja.

Žalba se podnosi neposredno pismeno, usmeno na zapisnik ili preporučeno putem pošte ovom organu i taksira se sa 15 KM administrativne takse prema tarifnom broju 3. Tarife federalnih administrativnih taksi.

Obradivač akta: Aida Bezdrob, dipl.ing.građ.

Po ovlaštenju  
Rukovodilac sektora za izdavanje vodnih akata

  
Nihad Pezo, dipl.inž.građ.

Dostaviti:

- AVP Sava – Sektor 30,
- ⊙ AVP Sava, ISV-vodna knjiga
- Sektor 40 – arhiva
- Oglasna ploča – AVP Sava